

Na osnovu člana 18. stav (1) tačka k), člana 19. stav (1) tačka g) i člana 41. stav (1) tačka c) Ustava Srednjobosanskog kantona („Službene novine Srednjobosanskog kantona“ broj 1/97, 5/97, 6/97, 2/98, 7/98 ispravka teksta; 8/98, 10/00, 8/03, 2/04 i 14/04) na prijedlog Vlade Kantona, Skupština Srednjobosanskog kantona na _____ sjednici održanoj _____ 2020. godine donijela je

NACRT

ZAKON O JAVNIM SKIJALIŠTIMA SREDNJOBOSANSKOG KANTONA

DIO PRVI. OSNOVNE ODREDBE

Član 1.

(Sadržaj zakona)

Ovim Zakonom o javnim skijalištima (u daljnjem tekstu; Zakon) propisuju se: način pružanja usluga na javnim skijalištu (u daljnjem tekstu; skijalište), upravljanje skijalištem, uvjeti za uređenje, održavanje i opremanje skijališta, obilježavanje i postavljanje signalizacija na skijalištu, korištenje sredstava prijevoza na skijalištu, sigurnost i red na skijalištu, podučavanje na skijalištu, nadzor, kao i druga pitanja koja su od značaja za korištenje skijališta.

Član 2.

(Primjena propisa)

Poslovi iz člana 1. ovog Zakona obavljaju se u skladu sa ovim Zakonom i drugim zakonima kojima se uređuju pitanja koja se odnose na skijališta i kosi transport.

Član 3.

(Ravnopravnost spolova)

Odredbe ovog Zakona odnose se podjednako na osobe muškog i ženskog spola, bez obzira na rod imenice upotrijebljene u tekstu ovog Zakona.

Član 4.

(Značenje izraza upotrebljenih u Zakonu)

Pojedini izrazi upotrijebljeni u ovom Zakonu, ako drugačije nije određeno, imaju slijedeće značenje:

- a) usluge na skijalištu su organizovanje skijanja i specijalizovanih zimskih sportskih aktivnosti, podučavanje skijanju, iznajmljivanje i servisiranje opreme za skijanje, prihvatanje i usluživanje skijaša i drugih korisnika skijališta;

- b) skijanje je zimska sportska aktivnost rekreativnog ili takmičarskog karaktera koja se sastoji od alpskog skijanja, nordijskog skijanja, biatlona, snowboarda, ski skokova ili skijanje na travi;
- c) skijaš je fizičko lice koje se u cilju rekreacije bavi skijanjem na ski stazi, ili se nalazi na ski stazi radi skijanja;
- d) ski staza je uređena i obilježena površina skijališta, namijenjena za skijanje i podučavanje skijanju, koju opslužuje najmanje jedno sredstvo kosog transporta;
- e) ski poligon je uređena i obilježena površina skijališta namijenjena specijalizovanim zimskim sportskim aktivnostima, koja je jasno i vidljivo odvojena od ski staza, posebno obilježena, na kojima se obavljaju specijalne zimske sportske aktivnosti;
- f) ski ruta je obilježena površina za vožnju skijama koju skijaški centar ne obezbjeđuje od neuobičajenih i neočekivanih opasnosti skijanja;
- g) ski put je put napravljen ili otvoren za vožnju skijama koji predstavlja dio ski staze, međusobno povezuje ski staze ili povezuje ski staze sa drugim objektima na skijalištu, ili služi za izvlačenje (evakuaciju) povrijeđenih skijaša;
- h) ski područje je prostor na kojem se nalazi skijalište čije su granice udaljene do dva kilometra od krajnjih granica uređenih i obilježenih ski staza;
- i) specijalizovane zimske sportske aktivnosti su sankanje, ski-bob, skokovi, motosankanje, vožnja sa ostalim pomoćnim spravama, skijanje u dubokom snijegu, paraglajding, skeleton i druge slične zimske sportske aktivnosti;
- j) takmičar je fizičko lice aktivno uključeno u skijaško takmičenje ili trening za takmičenje na stazi ili dijelu staze određene od strane skijaškog centra;
- k) uobičajena opasnost i rizik skijanja je opasnost odnosno rizik koji prosječan skijaš, pri potrebnoj pažnji, mora ili može predvidjeti da će postojati na vrsti staze koju koristi, pod uvjetom da je poštovao pravila utvrđena ovim Zakonom i propise donijete na osnovu ovog Zakona;
- l) alpski rizik je situacija koja sa sobom nosi veliki rizik za lica na skijalištu (opasnost lavine, odrona kamenja, pada u provaliju, zatrpavanja snijegom koji visi iznad litice, ekstremna zaleđenost staze ili ključnog dijela staze i sl.);
- m) neuobičajena i neočekivana opasnost skijanja je opasnost odnosno rizik koju prosječan skijaš, pri potrebnoj pažnji, nije mogao predvidjeti da će postojati na vrsti staze koju koristi, pri datim vremenskim uvjetima, pod uvjetom da je poštovao pravila utvrđena ovim Zakonom i propise donijete na osnovu ovog Zakona;
- n) smanjena vidljivost postoji ako zbog nepovoljnih atmosferskih ili drugih prilika skijaš ne može jasno da uoči druga lica koja se nalaze na skijalištu na udaljenosti od najmanje 20 metara;
- o) skijaška nesreća je nezgoda na stazi u kojoj je učestvovao najmanje jedan skijaš u pokretu, i u kojoj je jedno ili više lica povrijeđeno ili poginulo ili je izazvana materijalna šteta;
- p) žičara je sredstvo kosog transporta sa posebnim saobraćajno - tehničkim osobinama (žičara i uspinjača) namijenjeno za prijevoz skijaša na stazu ili sa staze;
- r) ski lift je sredstvo kosog transporta za vuču skijaša po snijegu, uzbrdo, sa vučnim užetom iznad glave ili sa užetom ispod glave skijaša;
- s) polazna stanica žičare ili lifta je mjesto sa koga korisnici žičare ili lifta otpočinju vožnju;
- š) izlazna stanica žičare ili lifta je prostor koji obuhvata plato za iskrcavanje sa okretnom stanicom ili povratnom užetnjačom;
- t) škola skijanja je pravno lice ili preduzetnik registrovan za obavljanje poslova podučavanja skijanja i specijalizovanih zimskih sportskih aktivnosti;
- u) instruktor skijanja je fizičko lice koje se bavi poslovima podučavanja skijanja i specijalizovanih zimskih sportskih aktivnosti i ima u skladu sa zakonom kojim je uređena oblast sporta, odgovarajuće zvanje instruktora, učitelja ili trenera skijanja i licencu nadležnog sportskog saveza;

- v) učenik skijanja je fizičko lice koje učestvuje kao polaznik škole skijanja za podučavanje skijanja i specijalizovanih zimskih sportskih aktivnosti;
- x) nadležni sportski savez je udruženje ili savez organizacija za obavljanje zimskih sportskih aktivnosti i djelatnosti koji je registriran u skladu sa zakonom kojim se uređuje sport i preko koga se ostvaruje opšti interes u oblasti sporta;
- y) motorne sanke su motorno vozilo sa dvotaknim ili četverotaktnim motorom sa pogonom na dizel ili benzin, sa jednim ili više sjedišta i skijama sprijeda za upravljanje, dizajnirana za zimsku vožnju na snijegu ili ledu, koja za kretanje ne zahtjeva cestu ili posebno uređenu stazu.
- z) vozač motornih sanki je lice osposobljeno za upravljanje motornim sankama na specijalizovanim stazama i površinama koje su posebno obilježene i pripremljene;
- ž) Spasilački stacionar je istureno odjeljenje bolničkog stacionara u smislu Zakona o zdravstvenoj zaštiti.

DIO DRUGI. SKIJALIŠTE

Član 5. (Pojam skijališta)

- (1) Skijalište predstavlja turistički infrastrukturni sistem na prostoru prirodnog dobra ili dobra u općoj upotrebi, od posebnog značaja za razvoj turizma i sporta u Srednjobosanskom kantonu, odnosno posebno uređenu javnu površinu, namijenjenu za organiziranje skijanja i drugih specijaliziranih zimskih aktivnosti sa pratećim objektima, uređajima i opremom čije je korištenje odnosno izgradnja od općeg interesa.
- (2) Obavljanje djelatnosti na skijalištima je u općem interesu, a skijališta su u skladu sa ovim zakonom pod jednakim uvjetima dostupna svim korisnicima.
- (3) Odredbe ovog zakona koje se odnose na skijalište, shodno se primjenjuju i na druge posebno uređene površine i prostore, namijenjene za skijanje i specijalizirane zimske sportske aktivnosti, osim ako ovim Zakonom nije drugačije određeno.

Član 6. (Planiranje skijališta)

- (1) Skijalište se planira i uređuje kao prostorna i tehničko-tehnološka cjelina.
- (2) Planiranje i uređenje skijališta vrši se na osnovu Prostornog plana Srednjobosanskog kantona, regulacionog plana područja i generalnog plana skijališta.
- (3) Izvedbenim planovima i projektima svih objekata na skijalištu, predviđenih generalnim planom skijališta, preciziraju se uvjeti izgradnje, uređenja i opremanja skijališta.
- (4) Planiranjem skijališta iz stava (1) ovog člana mora se smanjiti mogućnost od alpskog rizika, opasnosti uslijed vremenskih prilika i opasnosti, uslijed istovremenog odvijanja saobraćajnih, rekreativnih i sportskih aktivnosti na skijalištu, u skladu sa planom zaštite zaštićenog područja, biodiverziteta i principima održivog razvoja turizma.

Član 7.
(Skijalište kao planinska oblast)

Vlada Srednjobosanskog kantona (u daljem tekstu: Vlada), na prijedlog Ministarstva privrede (u daljnjem tekstu: Ministarstvo) u skladu sa Zakonom o koncesijama Srednjobosanskog kantona, Prostornim planom Srednjobosanskog kantona i Strategijom razvoja turizma Srednjobosanskog kantona, može odlukom proglasiti skijalištem dio planinske oblasti u visokoj zoni planine, ukoliko ispunjava uvjete u pogledu trajanja snježnog pokrivača i ostalih prostornih karakteristika (nagib, visinska razlika, ekspozicija padina), u skladu sa ovim zakonom.

Član 8.
(Skijalište od značaja za turizam)

- (1) Vlada, na prijedlog Ministarstva, može odlukom pojedina skijališta, odnosno prostore pogodne za uređenje skijališta proglasiti od posebnog značaja za razvoj turizma.
- (2) Odluka iz stava (1) ovog člana sadrži sljedeće podatke:
 - a) procjenu opravdanosti za proglašenje skijališta, odnosno prostora pogodnog za uređenje skijališta od značaja za razvoj turizma i sporta;
 - b) naziv i opis skijališta, odnosno prostora pogodnih za uređenje skijališta;
 - c) površine skijališta;
 - d) popis katastarskih parcela;
 - e) podatke o vlasništvu;
 - f) detaljan opis granica skijališta sa kartografskim prikazom odgovarajuće razmjere za područja veće površine;
 - g) obaveze u pogledu očuvanja biodiverziteta i razvoja skijališta ;
 - h) podatke o nazivu privrednog subjekta kojem se skijalište povjerava na upravljanje;
- (3) Odlukom iz stava (1) ovog člana može se utvrditi i opći interes za eksproprijaciju, ako je to potrebno za sprovođenje mjera zaštite skijaškog područja za izgradnju i razvoj skijališta;

Član 9.
(Koncesije za skijališta)

- (1) Vlada može skijalište, odnosno prostor pogodan za izgradnju sistema kosog transporta (žičare, ski liftovi i dr.) odlukom dati na korištenje i upravljanje putem dodjele koncesije za izgradnju i upravljanje skijalištem, odnosno sistemom kosog transporta.
- (2) Odluka iz stava (1) ovog člana sadrži podatke o skijalištu koje se daje na koncesiju, uvjete i način korištenja skijališta i ostale podatke u skladu sa zakonom koji uređuje oblast koncesija.

Član 10.
(Korištenje skijališta)

- (1) Skijalište se može koristiti za obavljanje djelatnosti i pružanje usluga na skijalištu, pod uvjetima jednakim za sve korisnike u skladu sa ovim Zakonom.
- (2) Alpsko, nordijsko i akrobatsko skijanje, biatlon, snowboard, kao i podučavanje skijanju se može obavljati samo na uređenim ski stazama.
- (3) Ski skokovi, kao i podučavanje ski skokovima se može obavljati samo na skakaonicama predviđenim za ski skokove.

- (4) Skijanje na travi, kao i podučavanje skijanju se može obavljati samo na predviđenim i uređenim stazama za skijanje na travi.
- (5) Specijalizovane zimske sportske aktivnosti i škole skijanja za početnike mogu se obavljati na ski poligonima koji moraju biti jasno obilježeni i vidljivo odvojeni od ski staza.
- (6) Skijalištima, kao i drugim posebno uređenim površinama, namijenjenim za skijanje i za specijalizovane zimske sportske aktivnosti, upravlja skijaški centar u skladu sa ovim Zakonom.
- (7) Odredbe ovog Zakona koje se odnose na skijalište shodno se primjenjuju i na druge posebno uređene površine, namijenjene za skijanje i specijalizovane zimske sportske aktivnosti, ako ovim Zakonom nije drugačije određeno.

Član 11.

(Djelatnost od općeg interesa)

- (1) Izgradnja, uređenje, opremanje, održavanje, korištenje i upravljanje skijalištem, kao i upravljanje prostorima pogodnim za uređenje skijališta, u smislu ovog Zakona, smatraju se djelatnostima od opšteg interesa.
- (2) Za obavljanje djelatnosti iz stava (1) ovog člana osniva se skijaški centar kao javno preduzeće ili privredno društvo, odnosno kao drugi oblik poduzeća ili poduzetnik, u skladu sa zakonskim i podzakonskim aktima kojim se uređuje pravni oblik preduzeća i uvjeti i način obavljanja djelatnosti od opšteg interesa.
- (3) Skijaški centar iz stava (2) ovog člana je obavezan da obezbijedi korištenje skijališta koja se nalaze u zaštićenom prirodnom području u skladu sa zakonodavstvom koje vrijedi za konkretno zaštićeno prirodno područje.
- (4) U provođenju aktivnosti iz stava (3) ovog člana, skijaški centar iz stava (2) ovog člana je obavezan na suradnju sa nadležnom Kantonalnom ustanovom za zaštićena prirodna područja u cilju njihove zaštite.
- (5) Skijaški centar iz stava (2) ovog člana je obavezan da uplani ski staze i druge sportske objekte koje koristi u katastar nekretnina nadležne općine i zemljišne knjige kod nadležnog općinskog suda u roku od dvije godine od dana stupanja na snagu ovog Zakona.

Član 12.

(Obaveze skijaškog centra)

Za obavljanje poslova iz člana 11. ovog Zakona, skijaški centar mora da u skladu sa ovim Zakonom:

- a) uredi i opremi skijalište i ski staze u skladu sa članom 16. ovog zakona
- b) organizira rad službi na skijalištu;
- c) ispuni sve sigurnosne zahtjeve na skijalištu;
- d) obezbijedi sistem kosog transporta na skijalištu;
- e) obezbijedi sistem veza na skijalištu i vezu sa najbližom zdravstvenom ustanovom i organom unutrašnjih poslova;
- f) obezbijedi dnevno i dugoročno praćenje vremenske situacije u području gdje se nalazi skijalište;
- g) zaključi ugovor o osiguranju kod osiguravajuće kuće za skijaše i druge neposredne korisnike skijališta od posljedica nezgoda na skijalištu ;
- h) obezbijedi odgovarajuću opremu za obavljanje djelatnosti skijaškog centra, kao sportsku i drugu opremu potrebnu za korištenje skijališta u sportske svrhe u skladu sa ovim Zakonom i propisima donesenim na osnovu zakona iz oblasti sporta:

l) da na ulazu na skijalište postavi natpis na kojem se nalaze deset zlatnih pravila za sve sudionike bijelih padina koje je propisala Međunarodna skijaška federacija (FIS) a koje se odnose na skijaška pravila saobraćaja i opšteg ponašanja na ski stazama, kojeg su obavezni da poštuju svi koji koriste skijaške staze za skijanje, bordanje, šetnju ili neku drugu aktivnost.

Član 13.
(Usluge skijaškog centra)

- (1) Skijaški centar na skijalištu pruža usluge organiziranja rekreativnog skijanja, takmičarskog (sportskog) skijanja i drugih specijaliziranih zimskih aktivnosti, podučavanje skijanju, iznajmljivanje i servisiranje opreme za skijanje kao i ugostiteljske i ostale turističke usluge korisnicima skijališta.
- (2) Skijaški centar je dužan sve informacije u vezi sa upotrebom skijališta korisnicima skijališta dostavljati putem razglasnog uređaja odgovarajuće jačine.
- (3) Skijaški centar je obavezan da obavijesti javnost preko sredstava javnog informiranja o početku korištenja i završetku korištenja skijališta za skijanje u tekućoj skijaškoj sezoni, kao i o svakom prekidu rada skijališta dužem od tri dana tokom skijaške sezone.
- (4) Skijalište može da se koristi za stručno osposobljavanje i usavršavanje u zimskim sportovima samo od strane subjekata koje ispunjavaju uvjete propisane ovim Zakonom i zakonom koji regulira oblast sporta.

Član 14.
(Odgovornost za štetu)

- (1) Na odgovornost za štetu prouzrokovanu na skijalištu primjenjuju se opća pravila o odgovornosti za štetu.
- (2) Pravom na naknadu štete prouzrokovane na skijalištu ne obuhvataju se one štete koje su rezultat uobičajene opasnosti i rizika skijanja.

POGLAVLJE I. UREĐENJE, OBILJEŽAVANJE, KORIŠTENJE I BEZBJEDNOST NA SKIJALIŠTU

ODJELJAK A. Uređenje

Član 15.
(Struktura skijališta)

Skijalište se sastoji iz jedne ili više ski staza, ski poligona, ski puteva, ski ruta, ski liftova, žičara, infrastrukturne mreže i objekata, kao i infrastrukture za zbrinjavanje otpada, servisnih objekata skijališta, snježne i servisne mehanizacije, servisnih puteva, sopstvenih energetske objekata, pristupnih puteva i parkinga na ulazima u skijalište, objekata za obavljanje djelatnosti.

Član 16.
(Uređivanje skijališta i ski staza)

- (1) Skijalište i pristupni putevi do skijališta ne mogu se graditi na površinama koje su pod uobičajenim sniježnim padavinama izložene lavinama.

- (2) Skijalište i ski staze se uređuju u zavisnosti od toga za koju su rekreativnu ili takmičarsku zimsku sportsku aktivnost namijenjene, tako da su skijaši zaštićeni od neuobičajenih i neočekivanih opasnosti skijanja i alpskih rizika.
- (3) Skijalište mora biti izgrađeno u skladu sa važećim propisima iz oblasti zaštite okoliša tako da zadovolji uvjete u pogledu očuvanja i zaštite životne sredine, kao i da ispunjava odgovarajuće sanitarno-higijenske uvjete što uključuje obavezno posjedovanje infrastrukture za zbrinjavanje otpada.
- (4) Uređivanje skijališta i stvaranje uvjeta za njegovo sigurno korištenje smatra se osobito:
 - a) prethodno tehničko uređivanje i tekuće održavanje skijališta;
 - b) zaštita od lavina;
 - c) postavljanje zaštita ispred zgrada, javnih puteva, provalija, šuma, stupova, stijena, vododerina, potoka i drugih opasnih mjesta;
 - d) postavljanje oznaka zabrana, upozorenja i obavijesti;
 - e) osiguranje službe spašavanja i pružanja prve pomoći;
 - f) osiguranje sistema veza na skijalištu i veza sa zdravstvenom ustanovom i organima unutrašnjih poslova;
 - g) osiguranje redarske službe na skijalištu.

Član 17. (Ski staze)

- (1) Ski staze na skijalištu moraju biti široke, pregledne, sa nagibom i visinskom razlikom, pripremljene tako da na njima nema rupa, vrtača, kamenih kompleksa ili drugih opasnih mjesta.
- (2) Opasna mjesta na ski stazi (krivine, ukrštanje staza, veće strmine, objekti, mjesta gdje se izvode radovi) moraju biti posebno obilježena i osigurana ogradama za usmjerenje, zaštitnim ogradama ili mrežama, oblogama protiv udaraca i sličnim sredstvima zaštite, odgovarajuće visine.
- (3) Ski staze moraju biti odvojene od ostalih vrsta skijaških terena i posebno označene odgovarajućom signalizacijom.
- (4) Alpsko i nordijsko skijanje, snoubord, kao i podučavanje skijanju obavlja se samo na ski-stazama.
- (5) Zaštitna zona ski staze je prostor širine jednog do pet metara koji se prostire uz ski-stazu.

Član 18. (Zabrana postavljanja reklama i natpisa)

Na ski stazi i zaštitnoj zoni ski staze nije dozvoljeno postavljanje reklama i natpisa koji nisu vezani za korištenje staze, osim reklamnih poruka na ogradi skijališta - ski staze.

Član 19. (Izgradnja žičare i ski liftova)

- (1) Izgradnja žičare na prostorima koji su pogodni za skijanje predstavlja radnju uređenja skijališta, u skladu sa ovim Zakonom.
- (2) Skijaški centar je dužan da obezbijedi dovoljan broj obučenog osoblja za održavanje i korištenje u tehnički ispravnom stanju žičara i ski liftova.
- (3) Skijaški centar je dužan da pojedinačno, za svaku žičaru i ski-lift obezbijedi vođu žičare sa jednim ili više pomoćnika, koji posjeduju odgovarajuće stručno znanje u

skladu sa posebnim propisima i koji su odgovorni za bezbjednost, urednost rada i saobraćaja žičare.

- (4) Skijaškom centru ili trećim licima je zabranjena izgradnja ili postavljanje objekata bilo koje vrste, koji nisu u funkciji žičare, na rastojanje do deset metara sa obje strane spoljnog užeta (zona zabrane gradnje).
- (5) Pravila koja se primjenjuju na žičare i ski-liftove, primjenjuju se i na ski-liftove sa vučnim užetom.

Član 20. (Količina snijega)

- (1) Ski staza može da se koristi za skijanje samo ako na njoj postoji količina snijega koja je dovoljna za nesmetano skijanje bez povećanog rizika.
- (2) Odluku o tome da li na ski stazi ima potrebna količina snijega za prirodnu ili vještačku podlogu za nesmetano skijanje bez povećanog rizika, donosi šef staza iz člana 56. ovog Zakona.

Član 21. (Zasnježivanje vještačkim snijegom)

- (1) U slučaju nedostatka prirodnog snijega skijaški centar može vršiti zasnježivanje ski staza vještačkim snijegom.
- (2) Proizvodnja vještačkog snijega u zaštićenim prirodnim područjima i područjima značajnim za osiguranje vode za piće, gdje su posebnim zakonima predviđene strožije mjere zaštite okoliša, mora se vršiti isključivo od vode i vazduha, bez dodavanja štetnih aditiva.

Član 22. (Liftovi, žičare i staze)

Skijaški centar obavezan je odrediti brojeve liftova, žičara i staza. Liftovi, žičare i staze mogu imati i nazive.

Član 23. (Prostor za polijetanje i slijetanje)

- (1) Sredstva sportskog vazduhoplovstva ne smiju polijetati i slijetati na ski stazu.
- (2) Ukoliko je u okviru skijališta uređen prostor za polijetanje i slijetanje, on mora biti jasno razdvojen od ski staze, odgovarajuće signaliziran i obezbijeđen od lavina.

Član 24. (Osvjetljenje na skijalištu)

Skijalište, odnosno njegove staze namijenjene skijaškim aktivnostima noću moraju imati odgovarajuće osvjetljenje, uključujući i neposredne prilaze, kao i trasu kosog transporta koja se koristi, tako da je osigurana bezbjednost svih lica koja se nalaze na stazi i njenim prilazima.

Član 25.
(Sletišta za helikoptera za pružanje hitne pomoći)

U okviru skijališta ili njegovoj neposrednoj blizini potrebno je uređenje odgovarajućeg mjesta za slijetanje helikoptera u cilju obezbijedenja pružanja hitne pomoći.

Član 26.
(Ski staze namijenjene za takmičenja)

- (1) Ski staza koja je pored rekreativnog namijenjena i takmičarskom skijanju ili samo takmičarskom skijanju uređuje se tako da ispunjava posebne uvjete (visinska razlika, dužina i širina staze, debljina snijega, zaštitne mjere, prepariranja staze, markiranje i dr.) utvrđene odgovarajućim međunarodnim takmičarskim pravilima koje je propisala Međunarodna skijaška federacija FIS i nacionalnim sportskim pravilima.
- (2) Takmičarska ski staza mora za vrijeme korištenja u svrhe rekreativnog skijanja da bude tako uređena da ispunjava opće uvjete utvrđene ovim Zakonom u pogledu markiranja, signalizacije i preduzimanja mjera koje osiguravaju bezbjednost skijaša.
- (3) Skijalište koje je u skladu sa ovim Zakonom utvrđeno kao sportski objekat od javnog interesa ima najmanje jednu ski stazu uređenu i homologizovanu, u skladu sa FIS pravilima, za nacionalna i međunarodna skijaška takmičenja.

ODJELJAK B. Obilježavanje

Član 27.
(Klasifikacija i obilježavanje ski staza)

- (1) Ski staze se klasificiraju i obilježavaju (markiraju) prema stepenu težine, u zavisnosti od svojstava područja, odnosno površina preko kojih se pruža staza.
- (2) Ski staze se obilježavaju numerisanim oznakama (štapovima) određenih boja. Ski staze se prema težini klasificiraju i obilježavaju kao:
 - a) laka staza - plava boja;
 - b) srednje teška staza - crvena boja;
 - c) teška staza - crna boja;
- (3) Ski rute i staze za motorne sanke se markiraju žutom bojom nezavisno od stepena težine. Oznake moraju biti tako postavljene da su više od snijega.
- (4) Ne moraju se obilježavati lako pristupačne i blago nagnute površine koje služe isključivo podučavanju osnovnih oblika vožnje skijama, pod uvjetom da nemaju rizičnih mjesta i da su jasno vidljive njihove granice, odnosno ivice.

Član 28.
(Granice skijališta)

- (1) Granice skijališta moraju biti označene na ključnim mjestima oznakama koje su vidljive u uvjetima normalne vidljivosti.
- (2) Označavanje granica skijališta vrši se štapovima narandžaste boje i tablom na kojoj se nalazi odgovarajući tekst.

Član 29.
(Panoramske table i table za orijentaciju)

Na skijalištu moraju da budu postavljene odgovarajuće panoramske table i table za orijentaciju.

ODJELJAK C. Održavanje

Član 30.
(Obaveze Skijaškog centra na održavanju staza i kosog transporta)

- (1) Skijaški centar obavezan je da za sve vrijeme trajanja ski sezone, odnosno za sve vrijeme upotrebe skijališta, kontroliše opšte stanje skijališta i da ga održava u ispravnom stanju, odnosno u stanju koje omogućava namjensko i bezbjedno korištenje staze.
- (2) U vrijeme kada skijalište nije u upotrebi (van sezone), skijaški centar je dužan da se stara o čuvanju skijališta i redovnom održavanju staza i opreme na skijalištu.
- (3) Održavanje ski staza obuhvata ljetno i zimsko održavanje.
- (4) Održavanje ski ruta, takmičarskih staza i specijalizovanih staza vrši se u zavisnosti od prirode staze, vremenskih uvjeta i zimske sportske aktivnosti koja se na njoj odvija.
- (5) Skijaški centar je obavezan da održava kosi transport i zaštitno područje oko kosog transporta u stanju koje omogućava bezbjedno korištenje kosog transporta, u skladu sa ovim Zakonom i propisima donesenim na osnovu ovog Zakona.

Član 31.
(Minimalni tehnički uvjeti)

Ministarstvo će propisati minimalno tehničke uvjete za uređenje, obilježavanje i održavanje skijališta uz prethodnu suglasnost Vlade.

ODJELJAK D. Signalizacija

Član 32.
(Odgovarajuća signalizacija)

Na skijalištu mora biti postavljena odgovarajuća signalizacija, tako da se ne može lako ukloniti i da odgovara stvarnim okolnostima na stazi.

Član 33.
(Znakovi obavještenja, upozorenja, obaveza i zabrana)

- (1) Signalizacija se vrši postavljanjem odgovarajućih znakova obavještenja, upozorenja, obaveza, zabrana, dopunskih tabli i svjetlosnih signala.

- (2) Znaci na skijalištu postavljaju se i održavaju tako da su vidljivi, da ne ometaju korištenje ski staza, da skijaši mogu na vrijeme da ih lako uoče i da blagovremeno postupe u skladu sa njihovim značenjem.
- (3) Postavljeni znakovi moraju da se uklone, dopune ili zamijene, ako njihovo značenje ne odgovara izmijenjenim uvjetima na skijalištu ili zahtjevima bezbjednosti.
- (4) Na skijalištu ne smiju da se postavljaju table, svjetla, stubovi ili drugi slični predmeti kojima se zaklanja ili umanjuje vidljivost postavljenih znakova, koji svojim oblikom, bojom, izgledom ili mjestom postavljanja podražavaju ili liče na neki znak na skijalištu, zaslijepljuju skijaše ili odvrćaju njihovu pažnju u mjeri koja može biti opasna za bezbjednost skijanja.
- (5) Vrstu znakova, njihov sadržaj, mjesto postavljanja i druga pitanja od značaja za ostvarenje funkcije znakova na skijalištima uredit će se posebnim pravilnikom kojeg donosi Ministarstvo uz saglasnost Vlade.

Član 34.

(Neobezbjedene ski staze)

- (1) Na neobezbjedenim ski stazama i van skijaških staza, skijaši se skijaju na vlastiti rizik.
- (2) U cilju spriječavanja korištenja neobezbjedenih staza, skijaški centar je obavezan da u okviru skijališta postavi odgovarajuća upozorenja i znakove opasnosti od sniježnih lavina, sniježnih streha, okomitih litica i rasjeda.

ODJELJAK E. Sredstva prijevoza na skijalištu

Član 35.

(Upotreba službenih motornih vozila, motornih sanki i mehanizacije)

- (1) Na ski stazi, osim službenih motornih vozila, ne može biti prisutno ni jedno drugo motorno vozilo, osim ako ovim Zakonom nije drugačije određeno.
- (2) Motorne sanke, osim službenih motornih sanki u službi skijaškog centra mogu da se koriste samo na specijalizovanim stazama i površinama koje su posebno pripremljene i obilježene za korištenje motornih sanki van područja koje je obilježeno kao ski staza, javni put, pješačka staza i pristupni put.
- (3) Korištenje motornih sanki na skijalištu, obaveze postupanja u slučaju nesreće, mjere bezbjednosti prilikom korištenja motornih sanki i druga pitanja korištenja motornih sanki na skijalištu, posebnim pravilnikom urediće Ministarstvo unutrašnjih poslova Srednjobosanskog kantona uz saglasnost Vlade.
- (4) Vozač motornih sanki ne smije vozilom da se kreće na stazi brzinom većom od 40 km na sat, odnosno brzinom većom od brzine dozvoljene postavljenim znakom za cijelu stazu ili njen dio.
- (5) Motorne sanke u službi spašavanja moraju biti obilježene znakom službe. Znak se postavlja na vidnom mjestu, veličine 40 cm u prečniku.
- (6) Mehanizacija za uređenje ski staze može da se koristi u vrijeme kada žičare i ski liftovi ne rade.
- (7) Ukoliko je upotreba mehanizacije za uređenje ski staze nužna za vrijeme rada žičara i ski liftova, skijaški centar je dužan da preduzme posebne mjere za obezbjeđenje sigurnosti skijaša.
- (8) Svako vozilo mehanizacije za uređenje ski staze koje radi na pripremanju ski staze ili se kreće na skijalištu mora da bude obojeno uočljivom bojom i opremljeno odgovarajućim svjetlima.

- (9) Svako vozilo mehanizacije za uređenje ski staze koje se nalazi zaustavljeno na stazi mora biti označeno odgovarajućim svjetlima.

Član 36.

(Održavanje kosog transporta i staza za kosi transport u tehnički ispravnom stanju)

- (1) Skijaški centar obavezan je da žičare, ski liftove i staze za kosi transport, održava i koristi u tehnički ispravnom stanju sa dovoljnim brojem obučenog osoblja.
- (2) Kada je žičara, ski lift i mehanizacija za uređenje skijaških staza u upotrebi mora se obezbijediti:
- a) stalna kontrola rada i tehnička ispravnost;
 - b) stalno održavanje i pravilno vršenje eksploatacije;
 - c) neposredno pružanje pomoći korisnicima, posebno djeci u slučaju očigledne opasnosti ili na zahtjev korisnika;
 - d) dovoljan broj preglednih informacija i upustava o ponašanju korisnika na sredstvima kosog prijevoza;
 - e) stalna koordinacija između stanja na stazama i upotrebe žičare.

Član 37.

(Javni prijevoz žičarom)

- (1) Prijevoz žičarom je oblik javnog prijevoza i obavlja se prema utvrđenom redu vožnje, koji mora biti uočljivo istaknut na polaznoj i završnoj stanici.
- (2) Skijaški centar obavezan je da skijaše upozori na odgovarajući način o mogućnosti oduzimanja ski passa zbog ponašanja suprotnog ovom Zakonu i pravilima o redu na skijalištu.

Član 38.

(Prekid rada žičare i ski lifta)

Skijaški centar može da prekine rad žičare ili ski lifta tek kada odgovorno lice, redar ili dežurni spasilac potvrdi da nijedno lice više ne koristi žičaru ili ski lift.

ODJELJAK F. Korištenje i rad skijališta

Član 39.

(Uslovi za obavljanje djelatnosti skijaškog centra)

Uslovi za obavljanje djelatnosti skijaškog centra su:

- a) uređeno i opremljeno skijalište u skladu sa ovim Zakonom, tako da je ono bezbjedno za korisnike;
- b) obezbjeđena služba održavanja reda na skijalištu i uređen red na skijalištu (pravila o redu na skijalištu);
- c) obezbjeđena služba spašavanja koja je opremljena neophodnom opremom za spašavanje;
- d) obezbjeđeno pružanje hitne medicinske pomoći na skijalištu;

- e) obezbijeđen sistem veza na skijalištu i veze sa najbližom zdravstvenom ustanovom i organom unutrašnjih poslova;
- f) obezbijeđeno (dnevno i dugoročno) praćenje vremenske situacije u području gdje se nalazi skijalište (meteorološko bdijenje);
- g) zaključen ugovor o osiguranju skijaša i drugih neposrednih korisnika skijališta od posljedica nezgoda na skijalištu;
- h) donešen plan rada za ski sezonu;
- i) utvrđena pravila o korištenju ski liftova i žičara, motornih sanki i mehanizacije za uređenje ski staza;
- j) zaključen ugovor sa javnim komunalnim preduzećem za redovan odvoz i zbrinjavanje otpada i smeća zaostalog na području skijališta;
- k) stalna suradnja sa odgovarajućim službama za zaštitu prirode, okoliša, šuma i voda na području skijališta u skladu sa ovim Zakonom i važećim propisima za te oblasti.

Član 40.
(Oprema skijaškog centra)

Opremu skijaškog centra čine:

- a) odgovarajući broj mašina i uređaja za pripremu i održavanje staza, srazmjerno broju i veličini staza;
- b) razglasni uređaj takve jačine da se može efikasno koristiti na skijalištu;
- c) sportska i druga oprema potrebna za korištenje skijališta u skladu sa ovim Zakonom i propisima donijetim na osnovu ovog Zakona.

Član 41.
(Upis u matičnu evidenciju kod Ministarstva)

- (1) Skijaški centar obavezan je da upiše skijalište u matičnu evidenciju u skladu sa ovim Zakonom.
- (2) Ministarstvo će donijeti pravilnik o upisu u matičnu evidenciju skijaških centara.

Član 42.
(Stručno osposobljavanje i usavršavanje)

Skijalište može da se koristi za stručno osposobljavanje i usavršavanje u zimskim sportovima samo od strane organizacija koje ispunjavaju zakonom propisane uvjete.

Član 43.
(Javnost rada)

Skijaški centar obavezan je da obavijesti javnost preko sredstava javnog informisanja o početku i završetku korištenja skijališta u tekućoj skijaškoj sezoni, kao i o svakom prekidu rada skijališta dužem od tri dana tokom skijaške sezone.

Član 44.
(Tehnički i vremenski uvjeti)

- (1) Takmičarsko i rekreativno skijanje, skijaška obuka i drugi oblici skijaških aktivnosti mogu se vršiti kada vremenski uvjeti omogućavaju bezbijedno korištenje usluga na skijalištu.
- (2) Skijalište može da radi noću ukoliko postoje tehnički i vremenski uvjeti i ako je obezbijeđena sigurnost skijaša.

Član 45.
(Opasnost i smanjena vidljivost)

Takmičarsko i rekreativno skijanje, skijaška obuka i drugi oblici skijaških aktivnosti ne mogu se vršiti na skijalištu:

- a) ako postoji opasnost od lavina;
- b) za vrijeme snježne vijavice, kiše, magle zbog koje je smanjena vidljivost i vjetra koji ugrožava bezbijednost vožnje, prema tipu žičare;
- c) kod visokog snijega - svježeg koji nije utaban i na snijegu koji je uslijed naglog topljenja postao suviše mekan;
- d) ako na stazama nema dovoljno snijega;
- e) ako su bezbijeđnosni uređaji i oznake toliko oštećeni da ne obezbjeđuju sigurnost skijaša ili za njega predstavljaju opasnost, kao i za vrijeme rada mašina za utabanje snijega;
- f) ako ne funkcionira sistem veza na skijalištu;
- g) ako nije osigurana redarska služba, služba spašavanja i služba pružanja prve pomoći.

Član 46.
(Prekid rada na skijalištu)

- (1) Kada na skijalištu nastupe okolnosti iz člana 45. ovog Zakona, skijaški centar je dužan da prekine rad na skijalištu ili dijelu skijališta.
- (2) Prekid rada traje sve dok traju okolnosti zbog kojih je uveden.
- (3) Ukoliko se zatvaranje ski staze vrši u toku dana, korisnik je obavezan da preduzme kontrolnu vožnju kako bi osigurao da se skijaši koji se nalaze na stazi udalje iz ugroženog područja.
- (4) Skijaški centar obavezan je da objavi na pogodan način na ulazu u skijalište razloge privremenog prekida, odnosno zabrane korištenja skijališta, ili jednog dijela skijališta.

ODJELJAK G. Spasilačka služba i služba prve pomoći

Član 47.
(Obezbjeđivanje spasilačka služba)

- (1) Skijaški centar obezbjeđuje spasilačku službu samostalno ili u saradnji sa odgovarajućom organizacijom koja je obučena za spašavanje i pružanje prve

pomoći povrijeđenom odnosno ugroženom skijašu na ski stazama u skladu sa zakonom i sportskim pravilima za gorske službe spašavanja.

(2) Broj spasilaca zavisi od dužine i težine ski staza:

- a) teška staza - na jedan km dužine - dva spasioca ;
- b) srednje teška staza - na jedan km dužine - jedan spasilac;
- c) laka staza - na / do dva km dužine -jedan spasilac ;

(3) Na skijalištu mora biti jasno i vidljivo označeno sjedište službe spašavanja, a spasioci moraju nositi posebnu uniformu i oznake.

Član 48. (Spasilačka služba)

(1) Skijaški centar obrazuje jedinstvenu službu spašavanja za cijelo skijalište.

(2) Služba spašavanja djeluje u okviru skijališta.

(3) Ukoliko u ski području u kome se nalazi skijalište ne funkcionira služba spašavanja, skijaški centar je obavezan da u granicama ski područja organizuje spašavanje skijaša kojima je potrebna pomoć iako se nalaze izvan granica skijališta.

(4) Skijaški centar, u slučaju iz stava (3) ovog člana, ima pravo na naknadu prouzrokovanih troškova od lica kome je pružena pomoć, osim ako je potreba za spašavanjem izazvana propustima u radu skijaškog centra.

(5) Služba spašavanja mora biti tako organizovana da je uvijek spremna za brzo djelovanje u spašavanja (pružanje prve pomoći i brzog transporta) skijaša koji su pretrpjeli nesreću na stazi ili njenoj zaštićenoj zoni.

Član 49. (Mjere spašavanja)

(1) Mjere spašavanja preduzimaju se isključivo preko lica stručno osposobljenih za spašavanje registrovanim kod nadležnog ministarstva.

(2) Služba spašavanja u svom sastavu obavezno ima obučene ekipe za spašavanje skijaša sa žičare.

(3) Opremu za spašavanje sa žičare obezbjeđuje skijaški centar, na način da na svakih 30 sjedećih mjesta na žičari bude jedan komplet.

(4) Spasioci moraju imati prednost korištenja žičara.

Član 50. (Naknada realnih troškova akcije spašavanja)

Skijaški centar ima pravo na naknadu realnih troškova akcije spašavanja od osoba koje su svojim nezakonitim ponašanjem doveli do ugrožavanja života i zdravlja ljudi ili izazvali opasnost za materijalna dobra u skladu sa općim propisima o odgovornosti za nastalu štetu, osim ako je potreba spašavanja nastala uslijed propusta u radu skijaškog centra.

Član 51. (Postupanje u slučaju nesreće na skijalištu)

Služba spašavanja, odnosno spasioci, u slučaju nesreće obavezni su da utvrde identitet lica koja su učestvovala u nesreći i da obezbijede dokaze vezane za prouzrokovanje

nesreće, a u slučaju nastanka smrti ili teške tjelesne povrede da neodložno obavijeste najbliži organ Ministarstva unutrašnjih poslova Srednjobosanskog kantona.

Član 52.

(Oprema i sredstva za spašavanje)

- (1) Oprema i sredstva za spašavanje moraju biti na skijalištu tako raspoređeni da su dostupni u najkraćem mogućem vremenu i smješteni u vidno označenom prostoru, uz stazu ili u spasilačkom stacionaru koji mora biti smješten na najpogodnijem dijelu skijališta.
- (2) Skijaški centar mora na skijalištu obezbijediti odgovarajuću opremu i prostor za službu spašavanja i privremeno zadržavanje povrijeđenog ili iznenada oboljelog skijaša.
- (3) Skijaški centar obavezan je da na skijalištu stalno održava propisan obim opreme i sredstava za spašavanje u ispravnom stanju.
- (4) Skijaški centar obavezan je da postavi na skijalištu tablu sa opisom tzv. alpskog signala stanja nužde, koji daje skijaš kome je potrebna pomoć jer se nalazi u opasnosti.

Član 53.

(Hitna medicinska pomoć)

- (1) Skijaški centar obezbjeđuje pružanje hitne medicinske pomoći samostalno ili u saradnji sa odgovarajućom zdravstvenom ustanovom, u skladu sa Zakonom o zdravstvenoj zaštiti Srednjobosanskog kantona.
- (2) Skijaški centar obezbjeđuje, uređuje i obilježava prostor, heliodrom, za slijetanje i uzlijetanje helikoptera u službi spašavanja za spašavanje teško povrijeđenih.
- (3) Skijaški centar osigurava pružanje hitne medicinske pomoći angažovanjem odgovarajućeg broja osposobljenih lica, obezbjeđenjem odgovarajućeg prostora za prihvatanje povrijeđenih i obezbjeđenjem odgovarajuće opreme i sredstava za pružanje hitne medicinske pomoći.
- (4) Skijaški centar je obavezan voditi evidenciju o nezgodama na skijalištu (identitet unesrećenih, vrijeme, mjesto i okolnosti nesreće) i o nastalim slučajevima nezgode obavjestiti nadležnu inspekciju za tu oblast.
- (5) Lica koja su angažovana za pružanje hitne medicinske pomoći moraju za vrijeme dežurstva nositi službenu odjeću i službenu iskaznicu, te biti opremljeni komunikacionim uređajima i opremom za hitnu medicinsku pomoć. Osoblju hitne medicinske pomoći mora biti obezbijeđena prednost u korištenju žičara, kao i druge prednosti vezane za obavljanje njihove djelatnosti.

Član 54.

(Bliži uvjeti u pogledu prostora, opreme i obilježavanja službe spašavanja)

Bliže uvjete u pogledu prostora, opreme i obilježavanja službe spašavanja propisat će Ministarstvo, uz mišljenje nadležne kantonalne uprave za civilnu zaštitu.

Član 55.
(Pravila o redu na skijalištu)

- (1) Skijaški centar obavezan je da vidno istakne pravila o redu na skijalištu, cijene za korištenje uređaja, opreme, prostora i usluga na skijalištu, kao i radno vrijeme skijališta i kosog transporta i da ih se pridržava u svom poslovanju.
- (2) Pravilima o redu iz stava (1) ovog člana bliže se uređuju, u skladu sa zakonom, prava i obaveze skijaša i drugih lica koja upotrebljavaju skijalište, način održavanja reda na skijalištu, vrijeme korištenja skijališta, radno vrijeme kosog transporta, pravila o organizovanju sportskih priredbi na skijalištu, upozorenja na eventualne opasnosti uslijed vremenskih i snježnih prilika i druga pitanja utvrđena ovim Zakonom koja se odnose na obezbijedenje reda na skijalištu.

Član 56.
(Šef staza)

- (1) Skijaški centar obavezan je da ima zaposleno lice sa sportskim stručnim zvanjem za staranje o bezbjednosti i redu na skijalištu (šef staza).
- (2) Šef staza mora da ima položen ispit za redara.
- (3) Ski staze ne mogu početi da se koriste u toku dana ukoliko šef staza nije to odobrio, na osnovu procjene da su ispunjeni svi uvjeti za bezbjedno korištenje staza.

Član 57.
(Redarska služba)

- (1) Skijaški centar obavezan je da za vrijeme rada skijališta obezbijedi redarsku službu koja mora imati odgovarajući broj redara, kako bi efikasno osigurala bezbjedno korištenje skijališta (patrole, dežurna mjesta i dr.), u skladu sa odredbama ovog Zakona i pravilima o redu na skijalištu.
- (2) Redarsku službu može obavljati lice koje ima završenu srednju školu i položi ispit za redara.
- (3) Broj angažiranih redara određuje se prema konkretnim okolnostima skijališta, a naročito prema očekivanoj učestalosti korištenja staza i broja, težine, veličine i preglednosti staza.
- (4) Redar je obavezan da za vrijeme obavljanja redarske službe nosi odjeću i oznake koje ga jasno identifikuju kao redara.
- (5) Ministarstvo će propisat način i program polaganja ispita za redara, sticanje ovlaštenja za obavljanje poslova redara, izgled i način izdavanja legitimacije redara.
- (6) Ski centar je obavezan obezbijediti da se na info table postavi raspored dežurstva, kopije iskaznica dežurnih redara sa fotografijama i brojevima njihovih službenih telefona.

Član 58.
(Dužnosti redara)

- (1) Redar u vršenju svojih dužnosti ovlašten je da:
- a) privremeno obustavi, do konačne odluke šefa staza, upotrebu skijališta ili nekog njegovog dijela na kome održava red, ako postoje okolnosti u kojima upotreba staze nije dozvoljena;
 - b) upozori, odnosno udalji sa skijališta ili njegovog dijela lica koja se ne pridržavaju pravila utvrđenih ovim Zakonom i pravila o redu na skijalištu, koja ne raspolažu ispravnom skijaškom opremom, koja prave nered na polaznim stanicama žičara ili su pod uticajem alkohola ili droge;
 - c) prekine rad žičara ski liftova dok se ne uspostavi red na ulaznim ili izlaznim stanicama žičara;
 - d) obavijesti nadležnu policijsku upravu ukoliko se skijaš ili drugi neposredni korisnik skijališta u korištenju skijališta ne pridržava utvrđenog reda na skijalištu;
 - e) uskrati jednu ili više vožnji žičarom licu koje svojim ponašanjem ugrožava ili može ugroziti bezbjednost upotrebe skijališta, odnosno žičare (lica pod uticajem alkohola ili droge), lica koja se ne pridržavaju utvrđenih pravila o ponašanju na skijalištu, lica koja sa sobom nose nedozvoljene predmete i sl.).
- (2) Kada skijaš ili drugo lice na skijalištu postupi suprotno nalogima redara, pruži fizički otpor ili svojim ponašanjem narušava javni red i mir ili ugrožava život, ličnu sigurnost ili imovinu građana, o tome se bez odlaganja obavještava nadležnu policijsku stanicu.

Član 59.
(Obaveza pridržavanja pravila o redu na skijalištu)

- (1) Skijaši su obavezni da se pridržavaju pravila o redu na skijalištu i uputstava i upozorenja koje im daju redari.
- (2) Skijaš je obavezan da:
- a) se na stazi ponaša tako da druge ne ugrožava ili povređuje;
 - b) vozi pažljivo i da brzinu i način vožnje prilagodi svojim znanjima i uvjetima staze (okoline) i dijela staze, vremenskim i snježnim prilikama, kao i broju skijaša na stazi;
 - c) izabere liniju (pravac, smjer) vožnje tako da skijaše koji voze ispred njega ne ugrožava i da je u mogućnosti da blagovremeno izbjegne sudar sa bilo kojim licem ili objektom ispred sebe;
 - d) druge skijaše pretiče, bilo lijevo ili desno, uvijek na takvom rastojanju koje im daje dovoljno prostora za sve njihove pokrete (kretanja);
 - e) kada želi da se uključi u vožnju na neku stazu ili kada nakon zaustavljanja na stazi nastavlja vožnju obavezno se uvjeri, gledanjem iznad i ispod, da može to da učini bez opasnosti po sebe ili druge;
 - f) u slučaju kada se penje, odnosno vraća uz stazu ili kada pješice silazi za kretanje koristi isključivo ivicu staze;
 - g) se uz stazu ne penje pješice nego da koristi žičaru;
 - h) poštuje postavljene oznake i signalizaciju;
 - i) u slučaju nesreće na stazi pruži drugome pomoć;
 - j) u slučaju nesreće, nezavisno da li je svjedok ili učesnik, nadležnoj službi skijaškog centra (redarskoj ili spasilačkoj) pruži svoje identifikacijske podatke;
 - k) poštuje uputstva redara;

- l) skija sa ispravnom i odgovarajućom opremom, a posebno da koristi skije koje su opremljene sredstvom (vezovi i dr.) koje je u stanju da zaustavi skiju u slučaju da se odvoji od skijaša;
 - m) ne ostavlja na stazi ili baca na stazu predmete i materijale koji mogu da ometaju ili ugroze bezbijeđnost drugih skijaša;
 - n) za skijanje na skijalištu koristi isključivo markiranu stazu, osim u slučaju opasnosti;
 - o) ako se skijalište nalazi u zakonom zaštićenom području poštuje pravila koja je za korištenje zaštićenog područja utvrdilo, u skladu sa zakonom, pravno lice koje upravlja zaštićenim područjem;
 - p) da svoj otpad odlaže isključivo u posude namijenjene za odlaganje otpada;
 - r) skijanje prilagodi uvjetima staze kada su nepovoljne vremenske prilike povećale stepen težine staze.
- (3) Skijaš ne smije:
- a) skijati na skijalištu, odnosno stazi koja je označena kao zatvorena;
 - b) uništavati, uklanjati, oštećivati ili na drugi način ugrožavati postavljene oznake i signalizaciju na skijalištu;
 - c) na bilo koji način ugrožavati stubove žičara, mašine za pripremu staze i drugu opremu na stazi;
 - d) skijati na stazi ukoliko je pod uticajem alkohola, droge ili nekog psihoaktivnog lijeka, odnosno sredstva koje negativno utiče na njegove sposobnosti;
 - e) napustiti mjesto sudara sa drugim skijašem prije nego što redarskoj službi korisnika da identifikacijske podatke, osim u slučaju kada je to nužno radi pružanja hitne medicinske pomoći povrijeđenom, u kom slučaju će se nakon predaje povrijeđenog na medicinsko staranje javiti najbližoj redarskoj službi skijaškog centra;
 - f) skijati unazad (natraške);
 - g) postavljati bilo kakve oznake ili ostavljati bilo kakve stvari bez nadzora na skijalištu bez dozvole skijaškog centra;
 - h) da se zaustavlja na usponu ili na vučnoj stazi ski lifta ako bi zaustavljanje moglo da ugrozi skijaše koji se prijevoze.
- (4) Snowborderi, trkači i hodači na skijama obavezni su da, pored mjera iz stava (2) ovog člana, poduzmu i druge mjere koje odgovaraju prirodi konkretne zimske sportske aktivnosti, u skladu sa odgovarajućim međunarodnim sportskim pravilima (FIS pravila).

Član 60.

(Pravila na skijalištu prilikom vožnje kosim transportom)

- (1) U cilju osiguranja bezbijeđnosti, skijaš je dužan da se prilikom vožnje kosim transportom (žičarom i ski liftom) pridržava i slijedećih pravila:
- a) ne smije da djeluje u toku vožnje žičarom na bilo koji način koji može da utiče na siguran rad i funkcioniranje instalacija žičare;
 - b) ne smije da mijenja, premješta, kvari uređaje i materijal bilo koje vrste koji služi žičari ili ski liftu;
 - c) ne smije da se penje na pogonske stanice i linijske stubove ili da zauzima mjesto koje nije namijenjeno korisnicima žičare ili ski lifta ili da ometa pristup tim mjestima;
 - d) ne smije bez opravdanih razloga da aktivira sigurnosne uređaje koji su mu pristupaćni ili da namjerno aktivira sigurnosnu rampu;
 - e) ne smije da namjerno otpusti vučnu napravu prije mjesta određenog za to ili prije izlazne stanice;

- f) ne smije da krivuda duž trase vučenja ski lifta, da izlazi iz trase vučenja, da ostaje na trasi vučenja u slučaju pada, da namjerno otpusti i baci vučnu napravu na linijski stub, da sjeda na vučnu napravu ili da zaljulja vučnu napravu na izlaznoj stanici;
 - g) ne smije da se njiše u sjedištu žičare, da se vozi bez spuštenog sigurnosnog rama, da ne upotrebljava naslon za noge, da iskače iz sjedišta duž trase žičare i da ljulja sjedište na izlaznoj stanici;
 - h) ne smije da trake štapova drži na zglobovima ruku;
 - i) ne smije da se zadržava na izlaznoj stanici;
 - j) ne smije da se zaustavlja na usponu, na vučnoj stazi ski lifta ili bilo kojoj površini;
 - k) ne smije u toku prijevoza žičarom ili ski liftom da baca ili odstranjuje bilo kakve predmete, osim po nalogu službenog lica skijaškog centra;
 - l) ne smije da se ukrca na žičaru koja ima oznaku da je zatvorena;
 - m) ne smije da se ponaša suprotno znakovima i uputstvima postavljenim u skladu sa ovim Zakonom ili bilo kojoj usmenoj instrukciji (uputstvo ili obavještenje) od strane službenih lica skijaškog centra koje se odnosi na bezbjedno korištenje žičare;
 - n) ne smije da se ukrca ili iskrca sa žičare na mjestima koja nisu za to određena i koja nisu pod kontrolom skijaškog centra (izvan stanica), osim u slučaju prekida vožnje i kada je radnja ukrcavanja i iskrčavanja bezbjedna;
 - o) ne smije da se iskrca sa žičare koja je stala u toku vožnje bez nadzora službenih lica skijaškog centra;
 - p) ne smije da koristi žičaru za prijevoz ako nema dovoljno fizičkih sposobnosti ili znanja i vještine za bezbjedno korištenje instalacija žičare, odnosno usluge prijevoza;
 - r) da se pridržava pravila o ukrcavanju, vožnji i silasku utvrđenih pravilima o redu na skijalištu.
- (2) Pravila iz stava (1) ovog člana, ski centar mora istaći na vidnim mjestima koja su dostupna skijašima.

Član 61.

(Obavijest Ministarstvu unutarnjih poslova Srednjobosanskog kantona o početku ski sezone)

- (1) Prije početka ski sezone skijaški centar obavezan je da obavijesti nadležno Ministarstvo unutarnjih poslova o datumu početka ski sezone i da zatraži pomoć za održavanje reda na skijalištu u toku sezone.
- (2) Pripadnici organa Ministarstva unutarnjih poslova, koji održavaju red na skijalištu, moraju biti obučeni za upotrebu skija i motornih sanki.
- (3) Kada skijaški centar u toku skijaške sezone očekuje veliki broj skijaša na skijalištu mora pravovremeno obavijestiti nadležnu policijsku upravu i zatražiti dodatnu pomoć za održavanje reda na skijalištu i uređenje saobraćajnog prometa za dolazak i odlazak sa skijališta.

Član 62.

(Obaveze vođe organizovane grupe)

- (1) Vođa grupe koji na skijalište ili poligon dovodi organizovanu grupu djece ili skijaša početnika dužan je da se stara o njihovom bezbjednom skijanju. Prije početka skijanja vođa grupe mora upozoriti redare na grupu ili početnike kojima redari moraju posvetiti posebnu pažnju.

- (2) Vođa grupe mora ispunjavati naloge redara i prekinuti skijanje grupe ili početnika ako njihovo skijanje nije bezbjedno.
- (3) U slučaju zaustavljanja grupe iz stava (1) ovog člana na ski stazi, vođa grupe mora postaviti odgovarajući znak upozorenja na ski stazi iznad pozicije zaustavljene grupe.

ODJELJAK H. Organizovanje sportskih priredbi

Član 63.

(Organizovanje sportskih priredbi na skijalištu)

- (1) Na skijalištu se mogu organizovati sportske priredbe (takmičenja, uključujući treninge i manifestacije) uz saglasnost skijaškog centra, pod uvjetima i na način utvrđenim ovim Zakonom, zakonom kojim se uređuje oblast sporta, zakonom o javnom okupljanju, propisima donijetim na osnovu ovih Zakona i pravila nadležnog sportskog saveza i FIS-a.
- (2) Pravo obavljanje djelatnosti iz stava (1) ovog člana imaju sportske organizacije registrirane za obavljanje zimskih sportskih aktivnosti i djelatnosti u skladu sa zakonom kojim se regulira oblast sporta.
- (3) Ski staza može da se koristi za takmičenja i treninge za takmičenja samo ako je uređena i homologizovana u skladu sa zakonom i odgovarajućim sportskim pravilima.
- (4) Za vrijeme sportske priredbe organizator sportske priredbe, pored prava i obaveza utvrđenih propisima kojima je uređena oblast sporta i sportskim pravilima nadležnog sportskog saveza za sportske priredbe, ima i prava i obaveze koji su ovim Zakonom utvrđeni za skijaški centar, ako sporazumom između skijaškog centra i organizatora nije drugačije utvrđeno.

Član 64.

(Pristup skijalištu na kome se održava takmičenje)

- (1) Na skijalištu odnosno njegovom dijelu na kome se održava takmičenje odnosno trening za takmičenje, pristup u toku održavanja takmičenja i treninga, imaju samo takmičari i službena lica organizatora, medicinsko osoblje i pripadnici službe spašavanja.
- (2) Službena lica organizatora obavezna su da blagovremeno obilježe odgovarajućim znakovima i zgrade ski staze na kojima će se održati takmičenje odnosno trening za takmičenje.
- (3) Pristupne staze za gledalište moraju biti uređene, vidno obilježene i ograđene.
- (4) Organizator priredbe obavezan je da po završetku priredbe, prije otvaranja skijališta za redovnu upotrebu, ukloni oznake, uređaje, rekvizite i druge predmete postavljene radi održavanja priredbe.

Član 65.

(Skijaško takmičenje od interesa za Kanton)

- (1) Skijaški centar obavezan je da omogući korištenje skijališta za organizovanje skijaškog takmičenja od interesa za Srednjobosanski kanton, koje je Ministarstvo obrazovanja, nauke, mladih, kulture i sporta uvrstilo u program domaćih i međunarodnih skijaških sportskih takmičenja i da za vrijeme održavanja takmičenja režim rada skijališta prilagodi potrebama takmičarskih uvjeta.

- (2) Korištenje skijališta iz stava (1) ovog člana regulira se ugovorom između organizatora manifestacije i skijaškog centra.

ODJELJAK I. Podučavanje skijanju

Član 66. (Škola skijanja)

- (1) Usluge podučavanja skijanju na skijalištu može da pruža pravno lice ili preduzetnik (u daljem tekstu: škola skijanja), uz saglasnost skijaškog centra, koja ispunjava slijedeće uvjete:
- a) da je registrovana za obavljanje djelatnosti sportskog podučavanja;
 - b) da ima vidno obilježeno mjesto za okupljanje polaznika;
 - c) da ima zaključen ugovor o osiguranju korisnika usluga podučavanja od posljedica nezgoda;
 - d) da ima angažirana lica sa važećom licencom za neposredno podučavanje.
- (2) Preduzetnik koji sam ispunjava uvjete propisane za instruktora skijanja, može da se bavi neposrednim podučavanjem skijanja i bez angažiranja drugih lica.
- (3) Neposrednim podučavanjem može da se bavi samo instruktor skijanja sa važećom licencom.
- (4) Uz instruktora može biti angažiran i asistent (samo za početnike škole skijanja).
- (5) Instruktor skijanja i asistent moraju da za vrijeme podučavanja nose oznake i odjeću koja ih jasno identifikuje kao lica koja podučavaju skijanje.
- (6) Škola skijanja može da se bavi samo onom vrstom podučavanja i one grupe polaznika koja odgovara sadržaju licence koju ima instruktor skijanja koji je angažiran u školi.

Član 67. (Način korištenja skijališta za školu skijanja)

- Škola skijanja koristi skijalište za podučavanje skijanju na slijedeći način:
- a) da upozori redare na ski stazi na lica koja se podučavaju na stazi;
 - b) da svojim učenicima prenese potrebna znanja vezana za tehniku skijanja i pravila ponašanja na skijalištu;
 - c) da prije početka kursa testira učenike i razvrsta ih u homogene grupe prema uzrastu, znanju skijanja i fizičkim sposobnostima;
 - d) da pruži hitnu medicinsku pomoć učeniku u slučaju potrebe;
 - e) da za vrijeme podučavanja ima obezbijeđen priručni komplet prve pomoći;
 - f) da njeni učenici poštuju obaveze vezane za ponašanje na stazi utvrđene ovim Zakonom i pravilima o redu na skijalištu.

Član 68. (Obuka za početnike)

Početni kurs (obuka) škole skijanja obavlja se samo na posebno uređenim, izdvojenim i označenim stazama ili padinama pogodnim za skijanje.

Član 69
(Ravnopravni uvjeti za korištenje skijališta)

Skijaški centar je obavezan da obezbijedi ravnopravne uvjete u pogledu korištenja skijališta svim školama skijanja, pod uvjetom da su ispunjene odredbe člana 66. ovog Zakona.

Član 70.
(Obuka bez sticanja dobiti)

- (1) Sportske organizacije, obrazovne ustanove, kao i državni organi i organizacije mogu da koriste skijalište za podučavanje skijanju isključivo za svoje članove i korisnike, bez svrhe sticanja dobiti.
- (2) Organi i organizacije iz stava (1) ovog člana ne mogu javno oglašavati i reklamirati u podučavanju skijanja.

Član 71.
(Odgovarajuće sportsko zvanje i licenca nadležnog saveza)

- (1) Instruktor skijanja može da se bavi podučavanjem skijanja pod uvjetom da posjeduje odgovarajuću licencu nadležnog sportskog saveza, u skladu sa ovim Zakonom i zakonom kojim se uređuje oblast sporta.
- (2) Uvjete i postupak izdavanja licence instruktorima skijanja i trajanje izdate licence uređuje nadležni sportski savez.
- (3) Nadležni sportski savez može da izda licencu instruktoru skijanja ukoliko ispunjava uvjete utvrđene zakonom i pravilima saveza.
- (4) Instruktor skijanja je obavezan da se stručno usavršava u skladu sa zakonom i sportskim pravilima nadležnog sportskog saveza.
- (5) Ministarstvo obrazovanja, nauke, mladih, kulture i sporta, daje suglasnost na pravila nadležnog sportskog saveza kojima se uređuju uvjeti i postupak izdavanja licence i stručno usavršavanje instruktora skijanja.

Član 72.
(Licenca ISIA – Međunarodne asocijacije instruktora sporta)

Stranac instruktor skijanja može da se na skijalištu bavi neposrednim podučavanjem skijanju pod uvjetom da posjeduje važeću licencu ISIA (Međunarodna asocijacija instruktora skijanja).

POGLAVLJE II. NADZOR

Član 73.
(Upravni i inspekcijski nadzor)

- (1) Upravni nadzor nad izvršavanjem odredaba ovog Zakona i propisa donijetih na osnovu njega, kao i drugih propisa kojima se uređuje djelatnost na skijalištu, vrši Ministarstvo i Ministarstvo obrazovanja, nauke, mladih, kulture i sporta, svako u okviru svoje nadležnosti.
- (2) Inspekcijski nadzor nad primjenom ovog Zakona i propisa donijetih na osnovu njega vrši Kantonalna turističko-ugostiteljska inspekcija i druge inspekcije u okviru svoje nadležnosti.
- (3) Inspekcijski nadzor nad organizovanjem sportskih priredbi na skijalištima i izdavanjem licenci instruktorima skijanja vrši nadležni inspektorat Ministarstva obrazovanja, nauke, mladih, kulture i sporta.
- (4) Ministarstvo unutrašnjih poslova Srednjobosanskog kantona vrši kontrolu upotrebe motornih sanki, a ovlašteni i certificirani organi i ustanove za vršenje tehničkog pregleda specijalnih vozila i radnih mašina vrše kontrolu tehničke ispravnosti motornih sanki i mehanizacije za uređenje ski staze, a po osnovu ugovora koji sa istim obavezno zaključuje skijaški centar.

Član 74.

(Nadležnosti turističke-ugostiteljske inspekcije i ovlaštenja turističko-ugostiteljskog inspektora)

- (1) U vršenju inspekcijskog nadzora turističko-ugostiteljski inspektor ovlašćen je da:
 - a) kontrolira ispunjenost uvjeta za obavljanje djelatnosti iz člana 39. ovog Zakona;
 - b) pregleda prostore i prostorije u kojima se obavlja djelatnost i pružaju usluge na skijalištu, ugovore, evidencije, isprave i drugu dokumentaciju potrebnu za utvrđivanje zakonitosti poslovanja skijaškog centra, kao i drugih pravnih lica i preduzetnika koji obavljaju djelatnost na skijalištu;
 - c) kontrolira da li skijaši i druga lica koriste skijalište na propisan način i sa odgovarajućom opremom.
- (2) Turističko-ugostiteljski inspektor ovlašten je da:
 - a) privremeno zabrani korištenje skijališta ako skijaški centar ne ispunjava uvjete utvrđene ovim Zakonom;
 - b) privremeno zabrani rad skijališta ili dijela skijališta ukoliko nastupe okolnosti iz člana 45. ovog Zakona, a skijaški centar nije prekinuo rad skijališta;
 - c) privremeno zabrani rad licu koje nije registrovano za obavljanje djelatnosti i pružanje usluga na skijalištu ili obavlja djelatnost ili pruža usluge suprotno odredbama ovog Zakona i propisa donijetih na osnovu njega;
 - d) privremeno oduzme evidencije, dokumenta i druga dokazna sredstva od značaja za utvrđivanje činjeničnog stanja i privremeno oduzme predmete i sredstva čija upotreba nije dozvoljena u okviru sporta, kao i predmete i sredstva kojima se vrše nedozvoljene radnje;
 - e) podnese prijavu nadležnom organu za učinjeno krivično djelo i podnese zahtjev za pokretanje prekršajnog postupka ili izda prekršajni nalog;
 - f) poduzme druge mjere i radnje za koje je ovlašten zakonom.
- (3) Inspektor će rješenjem utvrditi vrijeme trajanja privremene zabrane obavljanja djelatnosti, kao i rok u kome su lica koja obavljaju djelatnosti i pružaju usluge utvrđene ovim Zakonom, dužna da otklone nedostatke zbog kojih je mjera izrečena.

Član 75.

(Ovlaštenja nadležnog inspektorata Ministarstva obrazovanja, nauke, mladih, kulture i sporta)

U vršenju inspekcijskog nadzora nad organizovanjem skijaških sportskih priredbi i izdavanja licenci instruktorima skijanja, nadležni inspektorat Ministarstva

obrazovanja, nauke, mladih, kulture i sporta, je ovlašten da naloži otklanjanje utvrđenih nepravilnosti i nedostataka u određenom roku i da zabrani održavanje sportske priredbe na skijalištu, ako nije obezbijeđeno njeno nesmetano i bezbijeđno održavanje.

Član 76.
(Javni interesi Kantona i općina)

- (1) Javni interes Kantona je:
 - a) izgradnja, obnova i održavanje javnih skijališta i drugih zimskih sportskih objekata i terena od interesa za Kanton;
 - b) omogućiti što većem broju školske populacije i mladih bavljenjem ski sportovima;
 - c) vrhunski sportski rezultat u oblasti zimskih sportova;
 - d) usavršavanje stručnog kadra za zimske sportove;
 - e) razvojno-istraživačka i promotivna djelatnost;
 - f) međukantonalna, međuentitetska i međunarodna saradnja;
 - g) koordinacija ukupnih sportskih aktivnosti;
 - h) dodjela javnih priznanja i nagrada zaslužnim djelatnicima u oblasti zimskih sportova.
- (2) Općine sa područja Srednjobosanskog kantona će svojim odlukama utvrditi javni interes općine u roku od šest mjeseci od dana stupanja na snagu ovog Zakona.
- (3) Za provođenje javnog interesa iz stava (2) ovog člana općina obezbjeđuju sredstva u Budžetu općine.
- (4) Nadležni organi općina sa područja Srednjobosanskog kantona u suradnji sa skijaškim centrom će posebnom odlukom propisati površine u okviru skijališta za kretanje motornih vozila, motornih sanki i mehanizacije iz člana 35. ovog Zakona.

POGLAVLJE III. KAZNENE ODREDBE

Član 77.
(Novčane kazne za prekršaj pravnih i odgovornih lica)

- (1) Novčanom kaznom od 1.500,00 do 15.000,00 KM kazniće se za prekršaj pravno lice ako:
 - a) ne učini skijalište dostupno svim korisnicima pod jednakim uvjetima (član 5. stav (2));
 - b) ako u roku od dvije godine od dana na stupanje ovog Zakona ne uplani ski staze i druge sportske objekte koje koristi u katastar nadležne općine, te u zemljišne knjige kod nadležnog općinskog suda. (član 11. stav (5));
 - c) ne zaključi ugovor o osiguranju kod osiguravajuće kuće za skijaše i druge neposredne korisnike skijališta od posljedica nezgode na skijalištu (član 12.tačka g));
 - d) ne kontroliše opšte stanje skijališta i ne održava ga u ispravnom stanju, odnosno u stanju koje omogućava namjensko i bezbijeđno korištenje staza (član 30. stav (1));
 - e) ne održava kosi transport i zaštitno područje oko kosog transporta u stanju koje omogućava bezbijeđno korištenje kosog transporta (član 30. stav (5));
 - f) ne uredi i opremi skijalište tako da je bezbijeđno za korisnike (član 39. tačka a));

- g) na skijalištu ne obezbijedi redarsku službu, službu spašavanja i službu hitne medicinske pomoći (član 39. tačka b) do d));
 - h) koristi skijalište suprotno članu 45. ovog Zakona;
 - i) ne prekine rad skijališta ili njegovog dijela, kada nastupe okolnosti iz člana 46. ovog Zakona;
 - j) ne omogući korištenje skijališta za organizovanje skijaškog takmičenja (član 65.));
 - k) koristi skijalište iako je privremeno zabranjeno korištenje (član 74. stav (2) tačka a) i b));
 - l) održava sportsku priredbu i pored zabrane (član 75.).
- (2) Za prekršaj iz stava (1) ovog člana kazniće se i odgovorno lice u pravnom licu novčanom kaznom od 300,00 do 3.000,00 KM.

Član 78.

(Novčane kazne za prekršaj pravnih i odgovornih lica)

- (1) Novčanom kaznom od 1.000,00 do 10.000,00 KM kazniće se za prekršaj pravno lice ako:
- a) dozvoli upražnjavanje specijalizovanih zimskih sportskih aktivnosti izvan ski poligona (član 10. stav (5));
 - b) odstupi od propisanih uvjeta za uređenje ski staza (član 16.));
 - c) posebno ne obilježi i ne osigura opasna mjesta na ski stazi (član 17. stav (2));
 - d) ne klasifikuje i ne obilježi staze prema stepenu težine (član 27.);
 - e) dozvoli upotrebu motornih sanki na ski stazi (član 35. stav (2));
 - f) nema obezbijeđen sistem veza na skijalištu i vezu sa najbližom zdravstvenom ustanovom i organom unutrašnjih poslova (član 39. tačka e));
 - g) na ulazu u skijalište ne objavi na pogodan način razloge privremenog prekida odnosno zabrane korištenja skijališta (član 46. stav (4)).
- (2) Za prekršaj iz stava (1) ovog člana kazniće se odgovorno lice u pravnom licu novčanom kaznom od 200,00 do 2.000,00 KM.

Član 79.

(Novčane kazne za prekršaj pravnih i odgovornih lica)

- (1) Novčanom kaznom od 500,00 do 5.000,00 KM kazniće se za prekršaj pravno lice ako:
- a) upotrebljava mehanizaciju za uređenje ski staze za vrijeme rada žičara i ski-liftova, a ne preduzme posebne mjere za obezbjeđenje sigurnosti skijaša (član 35. stav (7) i (8));
 - b) ne propiše pravila o redu na skijalištu (član 39. tačka b));
 - c) ne pridržava se utvrđenog plana rada za ski sezonu (član 39. tačka h));
 - d) ne zaključi ugovor sa javnim komunalnim preduzećem za redovan odvoz i zbrinjavanje otpada i smeća zaostalog na području skijališta (član 39. tačka j));
 - e) ne surađuje sa odgovarajućim službama za zaštitu prirode, okoliša, šuma i voda na području skijališta u skladu sa ovim Zakonom i važećim propisima za te oblasti (član 39. tačka k));
 - f) ne rasporedi opremu i sredstva za spašavanje tako da su dostupna u najkraćem mogućem vremenu i ne smjesti ih u vidno označenom prostoru (član 52. stav (1));
 - g) ne obezbijedi na skijalištu odgovarajuću opremu i prostor za službu spašavanja i zadržavanje povrijeđenog ili iznenada oboljelog skijaša (član 52. stav (2)).

- (2) Za prekršaj iz stava (1) ovog člana kazniće se i odgovorno lice u pravnom licu novčanom kaznom od 100,00 do 1.000,00 KM.

Član 80.

(Novčane kazne za prekršaj pravnih i odgovornih lica)

- (1) Novčanom kaznom od 500,00 do 2.000,00 KM kazniće se za prekršaj pravno lice ako:

- a) ne označi granice skijališta na ključnim mjestima oznakama koje su vidljive u uvjetima normalne vidljivosti (član 28. stav (1));
- b) vozila mehanizacije za uređenje ski staza ne oboji uočljivom bojom i ne opremi odgovarajućim svjetlima (član 35. stav (9));
- c) ne pruži neposrednu pomoć korisnicima, posebno djeci, u slučaju očigledne opasnosti ili na zahtjev korisnika (član 36. stav (2) tačka c));
- d) prekine rad žičara i ski liftova u trenutku kada jedno ili više lica koristi žičaru ili ski lift (član 38.);
- e) ne obezbijedi praćenje vremenske situacije u području gdje se nalaze skijališta (član 39. tačka f));
- f) dužim prekidima rada skijališta ne obavijesti javnost putem sredstava javnog informisanja (član 43.);
- g) dozvoli rad skijališta noću, a za to ne postoje tehnički i vremenski uvjeti i nije obezbijeđena sigurnost skijaša (član 44. stav (2));
- h) vidno i jasno ne označi sjedište službe spašavanja (član 47. stav (3));
- i) ne istakne pravila o redu, radno vrijeme skijališta i kosog transporta, cijene za korištenje uređaja, opreme, prostora i usluga na skijalištu i ne pridržava ih se u poslovanju (član 55. stav (1));
- j) odredi za šefa staza lice koje ne ispunjava uvjete iz člana 56. stav (1) i (2) ovog Zakona;
- k) redarsku službu obavlja lice koje ne ispunjava uvjete iz člana 57. stav (2) ovog Zakona;
- l) ne obavijesti nadležne organe o tačnom početku ski sezone (član 61. stav (1));
- m) organizuje sportsku priredbu na skijalištu suprotno odredbama člana 63 ovog Zakona;
- n) dozvoli pristup dijelu skijališta na kome se održava takmičenje licu koje nije takmičar ili službeno lice organizatora (član 64. stav (1));
- o) organizator priredbe ne ukloni oznake, uređaje, rekvizite i druge predmete postavljene radi održavanja priredbe (član 64. stav (4));
- p) pruža usluge podučavanja skijanju suprotno članu 66. ovog Zakona;
- r) početni kurs škole skijanja obavlja suprotno članu 66. i članu 68. ovog Zakona;
- s) izda licencu instruktoru skijanja iako nisu ispunjeni propisani uvjeti (član 71. stav (3)).

- (2) Za prekršaj iz stava (1) tač. p) i r) ovog člana kazniće se i preduzetnik novčanom kaznom od 1.000,00 do 10.000,00 KM.

- (3) Za prekršaj iz stava (1) ovog člana kazniće se i odgovorno lice u pravnom licu novčanom kaznom od 200,00 do 2.000,00 KM.

Član 81.

(Novčane kazne za prekršaj fizičkih lica)

Novčanom kaznom od 150,00 do 1.500,00 KM kazniće se za prekršaj fizičko lice:

- a) ako koristi motorne sanke suprotno članu 35. stav (5) ovog Zakona;
- b) šef staza koji suprotno članu 56. stav (3) ovog Zakona odobri korištenje staze iako nisu ispunjeni svi uvjeti za njeno bezbjedno korišćenje;
- c) ako ne postupi po nalogima redara (član 58. stav (1));
- d) skijaš ako vožnjom teže ugrozi bezbjednost na ski stazi (član 59. stav (2) tačka b));
- e) skijaš ako uništi, ukloni ili ošteti oznake ili signalizaciju na skijalištu (član 59. stav (3) tačka b)).

Član 82.

(Novčane kazne za prekršaj fizičkih lica)

Novčanom kaznom na licu mjesta u iznosu od 300,00 KM kazniće se za prekršaj fizičko lice ako:

- a) koristi motorne sanke suprotno članu 35. stav (2) ovog Zakona;
- b) kao vođa grupe djece ili skijaša početnika ne upozori redara na grupu ili ne ispuni naloge redara iz člana 62. ovog Zakona;
- c) radi kao instruktor skijanja, a nema licencu nadležnog sportskog saveza (član 71. stav (1) ili ne posjeduje važeću licencu ISIA (član 72.)

Član 83.

(Novčane kazne za prekršaj fizičkih lica)

Novčanom kaznom na licu mjesta u iznosu od 200,00 KM kazniće se za prekršaj fizičko lice ako:

- a) kao spasilac ne nosi vidne oznake na uniformi koje ga identifikuju kao spasioca (član 47. stav (3.));
- b) za vrijeme obavljanja redarske službe ne nosi odjeću i oznake koje ga jasno identifikuju kao redara (član 57. stav (4));
- c) ponaša se suprotno odredbama član 59. i 60. ovog Zakona;
- d) kao instruktor skijanja za vrijeme podučavanja ne nosi oznake i odjeću koja ga jasno identifikuje kao lice koje podučava skijanju (član 66. stav (5)).

POGLAVLJE IV. PRIJELAZNE I ZAVRŠNE ODREDBE

Član 84.

(Primjena drugih zakona i propisa)

- (1) Kod izgradnje, uređenja i održavanja skijališta i drugih zimskih sportskih objekata njihovi vlasnici i skijaški centri, obavezni su da primjenjuju Evropsku konvenciju o pravima osoba sa invaliditetom, Konvenciju o pravima osoba sa invaliditetom namijenjenu djeci, kao i Zakon o sportu u Bosni i Hercegovini i Zakon o sportu Srednjobosanskog kantona u cilju obezbjeđenja ravnopravnog pristupa invalidnih osoba tim objektima.
- (2) Kod izgradnje, uređenja i održavanja skijališta i drugih zimskih sportskih objekata njihovi vlasnici i skijaški centri, obavezni su da odgovarajuće primjenjuju Zakon o

zaštiti okoliša, Zakon o zaštiti prirode, Zakon o zaštiti voda i Zakon o upravljanju otpadom, kao i Zakone kojim se pojedina zaštićena područja, pejzaži ili vode proglašavaju zaštićenim spomenikom prirode.

Član 85.

(Rok za donošenje podzakonskih propisa)

Propisi koji se donose na osnovu ovlaštenja iz člana. 31., član 33. stav (5), član 35. stav (3) ,član 41.stav (2), član 54., član 57. stav (5) i člana 76.stav (4) ovog Zakona biće donijeti u roku od šest mjeseci od dana stupanja na snagu ovog Zakona.

Član 86.

(Rok za usklađivanje općih akata)

Preduzeća i druga pravna lica dužna su uskladiti svoje opće akte i poslovanje sa odredbama ovog Zakona u roku od šest mjeseci od dana njegovog stupanja na snagu.

Član 87.

(Rok za ispunjavanje uvjeta za zaposlenike)

Skijaški centar je dužan da obezbijedi da zaposlena, odnosno angažirana lica na poslovima šefa staza i redara ispune uslove utvrđene ovim Zakonom u roku od šest mjeseci od dana stupanja na snagu ovog Zakona.

Član 88.

(Prestanak primjene Zakona i Pravilnika)

Stupanjem na snagu ovog Zakona na području Srednjobosanskog kantona prestaje primjena svih zakonskih i podzakonskih akata kojim su se propisali poslovi navedeni u članu 1. ovog Zakona.

Član 89.

(Stupanje na snagu ovog Zakona)

Ovaj Zakon stupa na snagu osmog dana od dana objavljivanja u "Službenim novinama Srednjobosanskog kantona".

OBRAZLOŽENJE ZAKONA O JAVNIM SKIJALIŠTIMA SREDNJOBOSANSKOG KANTONA

USTAVNI OSNOV ZA DONOŠENJE ZAKONA

Ustavni osnov za donošenje Zakona o Javnim skijalištima Srednjobosanskog kantona je u poglavlju III. članu 2.stav (1) tačka g)., poglavlju III. članu 4.stav (1) tačka k)., i poglavlju V. odjeljak 1.član 6. stav (1) tačka c). Ustava Federacije Bosne i Hercegovine („Službene novine Federacije Bosne i Hercegovine“ broj 1/94), poglavlju IV. članu 18. stav (1) tačka k)., članu 19.stav (1) tačka g). poglavlju V odjeljku A članu 41. stav (1). tačka c). Ustava Srednjobosanskog kantona („Službene novine Srednjobosanskog kantona“ broj 1/97, 5/97, 6/97, 2/98, 7/98-ispravka teksta, 8/98, 10/00, 8/03, 2/04 i 14/04).).

Poglavlje III. član 2.stav (1) tačka g. Ustava Federacije Bosne i Hercegovine reguliše turizam kao nadležnost Federacije i kantona.

Poglavlje III. član 4. stav (1) tačka k). Ustava Federacije Bosne i Hercegovine definiše da su kantoni posebno nadležni za stvaranje i primjenu politike kantonalnog turizma i razvoja turističkih resursa.

Poglavlje V. odjeljak 1.član 6.stav (1) tačka c). Ustava Federacije Bosne i Hercegovine propisuje obavezu zakonodavnog tijela kantona da donosi propise za izvršavanje kantonalnih nadležnosti.

Poglavlje IV. član 18.stav (1) tačka k). Ustava Srednjobosanskog kantona propisuje da je kanton posebno nadležan za stvaranje i primjenu politike kantonalnog turizma i razvoj turističkih resursa.

Poglavlje IV. član 19. stav (1) tačka g). Ustava Srednjobosanskog kantona propisuje da Federacija i Kanton imaju nadležnost za turizam.

Poglavlje V odjeljak A član 41. stav 1. tačka c). Ustava Srednjobosanskog kantona propisuje da Skupština Kantona donosi zakone Kantona..

II - RAZLOZI ZA DONOŠENJE

Proceduru primpreme Nacrta Zakona uradilo je Ministarstvo privrede Srednjobosanskog kantona obzirom da su zimski sportovi usko povezani sa turizmom i ugostiteljstvom i saobraćajnom infrastrukturom.

Osnovni motiv, odnosno razlog za donošenje ovog Zakona sadržan je u potrebi za stvaranje kvalitetnog zakonskog osnova za podizanje kvaliteta ponude u javnim skijalištima na prostoru Kantona, kao značajnom segmentu turističke ponude i planinskog turizma Kantona

Naime, ovaj Zakon, po prvi put, na sveobuhvatan način definiše minimalno tehničke uslove, uslove za uređenje, održavanje i opremanje skijališta, pružanje usluga na skijalištu, bezbjednost i red na skijalištu, kao i druga pitanja koja su od značaja za korištenje skijališta. Zakonom o turističkoj djelatnosti (Sl.novine F BiH, broj 32/09), oblast uređenja javnih skijališta i usluga koje se na njima pružaju, definisana je samo kroz jedan manji broj članova, usled čega je veliki broj pitanja ostao nedefinisan.

Pored navedenog, značajni razlozi za donošenje ove odluke sadržani su u tome što se njime stvaraju sljedeće pretpostavke:

- kvalitetnije uređenje oblasti pružanja usluga na skijalištu,
- podizanje nivoa bezbjednosti korisnika usluga na skijalištu,
- bolja promocija turističkog proizvoda
- kvalitetnija turistička ponuda
- povećavanje efikasnosti inspeksijske i upravne kontrole u ovoj oblasti.

III USAGLAŠENOST SA EVROPSKIM ZAKONODAVSTVOM I POTVRĐENIM MEĐUNARODNIM KONVENCIJAMA

Ovim Zakonom, oblast uređenja i pružanja usluga na skijalištima, definisana je u skladu sa međunarodnim pozitivnim propisima i iskustvima, i isti je usaglašen sa standardima Evropske Unije. U znatnoj mjeri korišteni su i inkorporirani elementi pozitivne zakonske regulative iz ove oblasti iz zemalja u kojima je skijaški turizam visoko razvijen. U tom pravcu, za izradu ovog zakonskog rješenja korištena su rješenja i iskustva Republike Austrije, Slovenije, i Srbije.

IV . KRATAK PREGLED ZAKONA

Nacrt zakona o javnim skijalištima sastoji se od 89 članaka koji su raspoređeni u 2 dijela, 4 poglavlja i 9 odjeljaka.

DIO PRVI. OSNOVNE ODREDBE:

U ovom dijelu definisane su osnovne odredbe koje se odnose na organizaciju i rad skijališta.

U članovima od 1.-4. definisani su : sadržaj zakona, primjena propisa, ravnopravnost spolova, značenje pojedinih izraza koji su upotrebljeni u zakonu.

DIO DRUGI. SKIJALIŠTE

U članovima od 5-14 definisani su: pojam skijališta, planiranje skijališta, skijalište kao planinska oblast, skijalište od značaja za turizam, koncesije za skijalište, obaveze skijaškog centra, usluge skijaškog centra, odgovornost za štetu kao i druge pojmove kojui su definisani u svim poglavljima i odjeljci.

POGLAVLJE I. UREĐENJE, OBILJEŽAVANJE, KORIŠTENJE I BEZBJEDNOST NA SKIJALIŠTU.

➤ ODJELJAK A. Uređenje

U članovima od 15.-26. definisano je sljedeće: struktura skijališta, uređivanje skijališta i ski staza, izgradnja žičare i ski liftova, pokrivenost staza snijego i njihovo zasneživanje, prostori za polijetanje i slijetanje sportskog vazduhoplovstva, osvjetljivanje na skijalištima i namjena ski staza za takmičenje.

➤ ODJELJAK B. Obilježavanje

U članovima od 27.-29 definisano je sljedeće: klasifikacija i obilježavanje ski staza, granice skijališta i postavljanje panoramskih tabli i tabli za orijentaciju.

➤ ODJELJAK C. Održavanje

U članovima 30. i 31. definisana je obaveza skijaškog centra da održava staze i žičare kao i tko je nadležan da propiše minimalno-tehničke uvjete za uređenje i održavanje staza.

➤ ODJELJAK D. Signalizacija

U članovima 32. - 34. propisana je obaveza skijališta da mora imati postavljenu signalizaciju, znakove obavještenja, upozorenja, obaveza i zabrana, kao i obaveze postavljanja signalizacije na neobezbjedenim stazama.

➤ ODJELJAK E. Sredstva prijevoza na skijalištu

U članovima od 35.-38 propisana je obaveza skijaškog centra da održava službena motorna vozila i mehanizaciju kao održavanje kosog transporta, održavanje žičara i pravila za upotrebu žičara.

➤ ODJELJAK F. Korištenje i rad skijališta

U članovima od 39.-46. propisano je slijedeće: djelatnost skijaškog centra, oprema skijaškog centra, tehnički i vremenski uvjeti, opasnost uslijed smanjene vidljivosti, kao i okolnosti po kojim treba prekinuti rad skijališta.

➤ ODJELJAK G. SPASILIČKA SLUŽBA I SLUŽBA PRVE POMOĆI

U članovima od 47.-62. propisano je slijedeće: obezbjeđivanje spasilačke službe i službe prve pomoći, mjere spašavanja, naknada troškova akcije spašavanja, postupanje u slučaju nesreće na skijalištu, pravila o redu na skijalištima, zadaci šefa staza, redarska služba i dužnosti redara, obaveza pridržavanja pravila i reda na skijalištima, pravila na skijalištu prilikom vožnje kosim transportom i obavjesti o početku ski sezone.

➤ ODJELJAK H. Organizovanje sportskih priredbi

U članovima od 63.-65. propisano je način organizovanja sportskih priredbi, pristup skijalištu na kome se održava takmičenje kao i skijaško takmičenje od interesa za kanton.

➤ ODJELJAK I. Podučavanje skijanju

U članovima od 66.-72. propisano je način rada škola skijanja , način korištenja skijališta za škole skijanja, obuke za početnike i izdavanje licence za instuktore skijanja.

POGLAVLJE II NADZOR

U članovima od 73.-76. propisano je tko vrši upravni i inspekcijski nadzor , nadležnost pojedinih inspekcija, ovlaštenja inspektora za sport i javni interes Kantona i oćina.

POGLAVLJE III. KAZNENE ODREDBE

U članovima od 77.-83. propisane su kaznene odredbe u skladu sa Zakonom o prekršajima Federacije Bosne i Hercegovine.

POGLAVLJE IV. PRIJELAZNE I ZAVRŠNE ODREDBE

U članovima 84.-89 tretiraju se prelazne i završne odredbe, odnosno primjena drugih zakona i propisa, rok za donošenje podzakonskih propisa, rok za usklađivanje akata, prestanak primjena zakona i pravilnika i stupanje na snagu ovog Zakona.

V FINANSIJSKA SREDSTVA ZA SPROVODJENJE OVOG ZAKONA

Za sprovođenje ove odluke zakona nije potrebno obezbijediti dodatna sredstva iz Budžeta Kantona

Obradivač Zakona: Ministarstvo privrede Srednjobosanskog kantona